

Napparsimasup najugaqarfimmi avataani misissorneqarnerani katsorsarneranilu kiffartuussinerit pillugit Namminersornerullutik Oqartussat nalunaarutaat nr. 2, 24. januar 2005-meersumi §9 meeqqanut arfinillit inorlugit ukiulinnut ingiaqataasinnaasut inuit marlungortinnissaanik Naalakkersuisunut allanngorteqqullugu aalajangiiffigisassatut siunnersuut.

(Inatsisartunut ilaasortaq Agathe Fontain, Inuit Ataqtigiit)

Akissuteqaat

(Meeqqanut, Inuusuttunut, Ilaqtariinnut Peqqinnissamullu Naalakkersuisoq)

Siullermeerneqarnera

Naalakkersuisut napparsimasup najugaqarfimmi avataani misissorneqarnerani katsorsarneqarneranilu kiffartuussinerit pillugit nalunaarummik nutaamik saqqummiussinissaat pillugu Inatsisartut aalajangiiffigisassaattut siunnersuummut Naalakkersuisut qujapput.

Meeraq nappaammik misissorneqartussaatiillugu katsorsarneqartussaatiilluguluunniit najugaqarfik qimallugu aallartariaqaleraangat ilaqtariinnut tamanna annertuumik artukkiisarpoq. Taamaammat ilaqtariinnut taama ilungersunartumik inissisimasunut pitsaanerpaanik sinaakkutissaqartitsiuarmissarput annertuumik pingaaruteqarpoq.

Soorlu siunnersuuteqartup allaaserisamini eqqaagaa nalunaarutaateqarpugut meeraq angerlarsimaffimmi avataaniinnerminni ataatsimik ingiaqateqarsinnaaneraniq periarfissiisumik. Marlunnik ingiaqateqarsinnaanissamut annertusiliinissamut siunnersuut Naalakkersuisuni pitsaasutut isigaarput.

Nutaamik nalunaarusiorneq, aaqqissuussamik annertusiliinermik imaqartoq, aaqqissuussap qanoq atorneqassanersoq misissorneqarnissaanik piunasaqaatitaqassaaq.

Siullertut eqqarsaatigisariaqarparput, ilaqtareeqarsinnaammat angajoqqaat imaluunniit qanigisaasut tamarmik ingiaqataanissaminnut ajornatorsiuteqartut. Imaassinnaavoq ilaqtariit arlalinnik meerartaqartut, taamaasillutillu ingiaqataanissaminnut periarfissaqassanngitsut. Tamatuma saniatigut ilaqtariit ingiaqataanerminni aningaasarsiorsinnaannginnertik pissutigalugu meeqqamut inuk ataasiinnaq ingiaqataasinnaasoq. Taamaalilluni aaqqissuussaq nutaaq akissaateqarnerusunut kisimi atuussinnaalissaaq. Angajoqqaat ingiaqataanissaanut aaqqissuussap annertusarnissaanut tamatumani siunertaanngilaq. Taamaammat aaqqissuussamut akuersinermi ilaqtariit ilaannut akunnattoorutaasinnaasut maluginiassallugit pingaaruteqarpoq.

Københavnimi Kalaallit Peqqissartut Illuanni napparsimasut angerlarsimaffianiinnissaat annertuumik unamminartorsiorfitsippit. Aamma nunatsinni napparsimasut unnuisarfiani taamaappoq. Peqqissartut Illuanni ineeraatai inuit marluk sinnerlugit unnuiffigineqarsinnaasut killilimmik amerlassuseqarput. Tamatuma saniatigut napparsimasut qanigisaasullu amerlasuut unnuisarmata, init tamanit atorneqarsinnaasut unamminartorsiorfitsippit. Nuummi napparsimasut akunnittarfianni ingiallortit amerlanerulerpata napparsimasut allat utaqqinerulerannik kinguneqassasoq eqqaaneqarsinnaavoq.

Taamaammat ilaqutariit tamaasa inissaqartissinnaanissaat qulakkeerumallugu qanoq aaqqissuuneqassanersut qulaajaaffiginissaanut annertuumik suliassaqarpoq. Taamaalilluni angalatitsineq najugaqartitsinerlu kisimik eqqartorneqarunnaarput. Tamatuma saniatigut erseqqissaatigisinnaavarput, pisariaqartitsineq naapertorlugu Peqqinnissaqarfik sinaakkutit iluanni aaqqissuussap annertusilerneqarnissaanut aningaasaliisinnaanngimmat.

Siunnersuummut tunngatillugu angajoqqaanik ingiaqateqartitsinerup aaqqissuussaanerata annertusinissaanut kiisalu ukiunut arfinilinnut killiliinissaq peqqissutsikkut ilisimasalinnit immikkut tunngavissaqanngitsoq naliliivigineqarpoq. Taamaammat aaqqissuussaq tamanna Peqqinnissaqarfiup isumagissaneraa eqqartorneqarsinnaavoq. Meeraq marlunnik ingiaqateqarsinnaannginnerani ilaqutariit iluaqutissinniarlugit aaqqissuussaq annertusinissaanik kissaateqartoqarpat, taava aaqqissuussaq pingaarnertut inunnik isumassuiniarnermik naliliivigineqartariaqarpoq.

Qulaani pineqartut aallaavigalugit angajoqqaanik ingiaqateqartitsisarnerup aaqqiivigineqarnissaanut annertusaasoqannginnerani apeqqutit arlallit sukumiinerusumik misissortariaqartut Naalackersuisut naliliipput. Taamaammat Naalackersuisut allanguutissatut imaattumik siunnersuuteqarput:

”Inatsisartut aalajangiiffigisassaattut siunnersuut Naalackersuisut peqquneqassasut napparsimasut angerlarsimaffiisa avataanni misissortittarnerannut katsorsarneqartarnerannullu kiffartuussinerit, tamatumani angajoqqaat ingiaqataasarnerat pillugu aaqqissuussaq annertusineqassagaluarpat nutaamik nalunaarusiortoqarneratigut sunik malitseqarsinnaanersoq misissueqqullugit. Misissuinerup inernerit kingusinnerpaamik UPA2023-mi saqqummiunneqassapput.”